

166 pelajar Malaysia dari Indonesia jalani proses kuarantin di IAB

Astro Awani

02 April 2020

Fareez Azman,

NILAI: Seramai 166 orang pelajar Malaysia dari Indonesia tiba di Pusat Pemantauan (Surveillance Centre) di Institut Aminuddin Baki (IAB) di Nilai hari ini.

Kesemua pelajar itu tiba di Lapangan Terbang Antarabangsa Kuala Lumpur (KLIA) pagi tadi sebelum dibawa menaiki tiga bas Polis Diraja Malaysia (PDRM) dan dua buah bas Jabatan Bomba dan Penyelamat (JBPM) ke institut itu.

Kumpulan pertama tiba di pusat itu sekitar jam 2.00 petang manakala kumpulan kedua tiba pada jam 3.16 petang.

Tinjauan Astro AWANI mendapati pergerakan kesemua bas dikawal ketat oleh anggota polis.

Kesemua pelajar itu akan menjalani saringan kesihatan dan kuarantin selama 14 hari bagi memastikan mereka bebas dari sebarang jangkitan COVID-19.

Daripada jumlah itu difahamkan tiga daripada pelajar berada dalam keadaan tidak sihat.

Manakala difahamkan, seramai 144 orang pelajar dari Medan, Indonesia akan tiba di KLIA pada petang Khamis sebelum dibawa ke institut yang sama bagi proses saringan kesihatan dan kuarantin selama 14 hari.

Sehingga kini, beberapa institut dibawah Kementerian Pengajian Tinggi (KPT) antaranya Akademi Kepimpinan Pendidikan Tinggi (AKEPT) turut digunakan sebagai Pusat Pemantauan terhadap pelajar dari luar negara yang dibawa pulang ke Malaysia.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/166-pelajar-malaysia-dari-indonesia-jalani-proses-kuarantin-di-iab-236439>